

最上乘佛法

平心靜氣 收攝身心 萬緣放下 當下現前一念心性 盡虛空 徧法界 豎窮三際 橫周十方 絕待無外 即曰真如

真如界內絕思議之言詮 寂滅心中離分別之假名 動心即錯 舉念即乖言語道斷 心行處滅 所言真如者 即吾人現前一念心性 本非肉團 亦非緣影 直是圓常湛寂之一心 以是無虛妄故真 無分別故如 其體不變 為眾生現前一念之心 用能隨緣 仍真如法界全體 所謂法界圓融體作我一念心 故我一念心全體是法界 法界無外 離此一心 一無所有 故知一切聖凡因果 世界微塵 無不依此心真如而為其體 隨染緣成世間六凡諸法 隨淨緣成四聖諸法 隨緣而其體不變 十界諸法全是真如 雖迷不滅 悟亦不增 不假修有 何待證成 故此一心真如者乃含生 本具天然之性德 吾人能於自心中徹底研究 則何難顯現 實相真如之理體哉

但在纏真如 非修弗顯 有眾生能觀無念 則為向佛智 所謂修者 即是觀照 無念即真如實相 無生死之有念 無涅槃之無念 亦無二邊之中念 乃至無念亦無 離能所 絕對待 是真無念者 即究竟覺

所謂離念境界 唯佛獨證者此也 經云：以不生滅為本修因 然後圓成不生滅果 無念者即是不生滅性 有念即有生住異滅 無念便無四相遷變 真源湛寂 本無生滅去來 但由最初一念妄動 無明不覺遂致三細六粗 而有生滅流轉

若觀一念起處 本自無念 無念即無生 則生滅寂 唯一心真 如若能觀察 知心無念 即得隨順入真如門 須知一切眾生 雖妄念紛飛 而妄無自性本來湛寂 是謂理即無念 若知妄念本空 體即真如 便是名字無念

若能觀察無念便是觀行無念 若觀至六根清淨 粗念脫落 便是相似無念亦可名相似覺 若觀至豁破無明細念 與真如法身相應 便是分證無念 亦名隨分覺 若觀至無明細念淨盡 始本無二 復歸真如心源 便是究竟無念亦名究竟覺 此從始至終 皆以觀照為修行乃至直登佛地 中間永無諸委曲相 是故無念乃成道之法要 歷代祖師指示修行祕訣